

Läbesluf Barbara.....

Barbara, dù büsch am 13. Februar 1973 ùs zweits vo vierne Chin de Eùtere Bernhard ù Marie-Therese Aeby-Schneuwly gscheicht cho. Im Jahr 1978 isch dini Familie is Igehim ùf Tentlinge zoge. Det hesch dù a ùnbeschwertì ù glüchlichì Chindhind verbrünge.

Na de obligatorischi Schuhzit z Güffersch ù z Plaffeie hesch dù d Verchüferlehr erfougrich im Placette z Fribürg abgchlosse.

Na mehrere Jahr Bruefserfahrig hesch dù dir entschlosse a anderì Bruefsrichtig izschla.

Begleitend zù dir Arbit i de Administration bi de Firma Logista z Givisiez, hesch dù dir für a Zweitusbüdig ar Handüsschu entschide.

Dù hesch dia hervorragend abgchlosse. Später hesch dù ùs koufmänischi Agsteuti bi de Firma Fust z Niderwange gwärchet bis dù di Steu bim Personauamt vom Staat im Jahr 2005 aträte hesch. Di Arbit hesch dù Barbara mit grosser Früd usgüebt.

Scho im Auter vo 16 Jahr hesch dù dina zuekünftig Ma de Patrick lehre kenne. Drü Jahr später hit ihr zwü i z iget Hus z Plaffeie chöne izieh. Am 10. Juni 1994 hit ihr zwü öch z „Ja – Wort“ gä.

2 ù as haubs Jahr später, am 2. Dezember 1996 het d Sabrina, öiersch erschta Mitli z Liecht vo de Wäut erblickt. Am jüngere Mitli, de Ramona, hesch dù z Läbe am 01. Februar 2000 gscheicht.

D Ramona ù d Sabrina si de Stouz gsi vo öch zwüne ù si das ging no !

Am liebschte hesch dù Barbara dini Zit mit de gliebtì Familie verbrünge. Im Winter sit ihr alizäme ga Schifahre ù im Summer hesch dù gär ab und zue Tennis gspüt.

Mit grosser Früd sid ihr jeda Sümmer mit de Familie ù Fründe a z Meer gfahre.

Leider hesch dù Barbara im Jahr 2001 dis ùngebore Chin verlore. Dä schwer Schicksausschlag het dini Familie sehr hört troffe.

Hesch dù Barbara dä Schmärz äch jemaus überwüne?

Vor 3 Jahr isch bi dir Barbara di heimtückischi Chrankhit Brüschtchrebs diagnostiziert cho. As het a schweri Zit zwüsche hoffe ù bange agfange , begleitet vo verschidene Therapie. Au das hesch dù ohne je o nùme inisch z jammer tapfer ertrage, ùf dir gno ù über dir lasse ergah.

De Patrick, d Sabrina ù d Ramona hi ging ihnes böschtmügliche gä ùm dir Barbara z ùnderstütze ù dis Lide z lindere.

Aghörigi ù Fründe hi das zum Alass gno, ùm dini Familie tatchräftig z ùnderstütze ù ihne bizstah.

Na chürzùm Spitauaufenthàt büsch dù am Sünntigabe i Awäsehit vo de Familie ù Fründe früdlich igschlafe....

Barbara, dù büsch a sehr gfühvollì ù ufgsteùti Persönlichkit gsi. Dù hesch dina Kampf gischt bis zùm Schluss nid verlore. Ùs aune blibe die wùnderbare ù leibevollì Erinnerung a di schöni Zit wo wir mit dir hi dörfe verbringe.

I üsum Härz wüsch dù liebi Barbara, gi witerläbe....

De Patrick, d Sabrina ù d Ramona hi z Läbe vo dir Barbara i jeder Hinsicht verschöneret.

Ihnes Läbe, das muess jetz trotz allùm wiltersch ga.....

Das ha i im Name vo de Familie vorgläse.....